



UNIVERSITÄTS-  
BIBLIOTHEK  
PADERBORN

**Les Fleurs Des Vies Des Saints Et Des Festes De Toute  
L'Annee, Suivant L'Usage Du Calendrier Romain Reforme**

Augmentees des Saints & Bien-heureux Peres Iesuites, de Saint Charles  
Borromeo, & de Sainte Françoise ; Avec le Martyrologe Romain, pour  
tous les iours de l'Annee ...

**Ribadeneyra, Pedro de**

**Paris, 1631**

viii La vie de s. Procope, mart.

---

[urn:nbn:de:hbz:466:1-75777](https://nbn-resolving.org/urn:nbn:de:hbz:466:1-75777)

lique, & quine luy portoient pas assez de respect. On peut voir le discours de ses miracles dans la vie, écrite par le Diacre Gandelberg, l'an 850. rapportée par Surius, en son 4. Tome, telle que nous l'auons succinctement représentée, où nous apprenons combien la vertu est odieuse & insupportable à ceux qui sont vicieux, dont la veuë chassieuse ne peut regarder la moindre lumière, & comme nostre Seigneur deffend ses seruiteurs, & rompt les pieges & filets de leurs ennemis, les faisant le plus souuent tomber dans la fosse qu'ils ont creusée pour y faire tomber les innocens: & combien les Saints sont charitables & misericordieux enuers ceux qui les persecutent, qu'ils fuyent veritablement les grandeurs de la terre, veu que Saint Goar pleura, & fit sept ans penitence pour les pechez de l'Euesque qu'il auoit affligé, & ayma mieux mourir d'une longue & fascheuse maladie, que d'estre Euesque. Sigibert fait mention de luy en sa Chronique de l'an 800. parlant de l'Empereur Maurice. Vincent Speculateur, liure 22. chapitre 13. Pierre de Natalibus, liure 6. chapitre 62. & le Cardinal Baronius en ses Annotations.

*L'Oùané des glorieux Apostres saint Pierre & S. Paul. En l'Inde S. Esay Prophete fut sé en deux, sous le Roy Manasse, & enteré sous le fameux chesne de Rogel, près du passage de l'eau. A Rome deceda saint Tranquilin martyr, pere des saints Marc & Marcellian freres, lequel ayant esté converti à la Foy de nostre Sauueur, par la predication de saint Sebastien, & baptisé par le bien-heureux Polycarpe Prestre, priant près du sepulchre de saint Paul le iour de l'Octaue, fut pris par les Payens & lapidé. A Fiesoli en Tosane se fait la feste de saint Romule Euesque, disciple de saint Pierre Apostre, lequel y fut enuoyé prescher l'Euangile, & ayant enseigné la Foy de nostre Sauueur en plusieurs lieux d'Italie, & puis retournant au siege de son Euesché, y fut martyrisé sous le Prince Domitian. En la Champagne d'Italie, sainte Dominique vierge, ayant rompu & brisé quelques idoles du temps de l'Empereur Diocletian, fut condamnée d'estre exposée aux bestes, de laquelle n'ayant receu aucun dommage, eut depuis la feste trébuchée. A mesme iour sainte Lucie natifue de la susdite Champagne, ayant esté apprehendee par un nommé Rixie Lieutenant, & cruellement tourmentée, le convertit neantmoins à la Foy, avec Antonin, Severin, Diodore, Dion, & autres dix-sept, lesquels ayant esté compagnons aux tourmens, eurent aussi tous part à la mesme couronne. A Treues S. Goar Prestre & Confesseur. A Gistelle en Flandres sainte Godolene martyre.*

*A Rome se fait la feste des saints martyrs Cluide concier-  
7. Nicobrate general des finances, Castor, Victorin & Symon-  
1112. nian, convertis à la Foy par saint Sebastien, & baptisés  
127. par saint Polycarpe Prestre, lesquels s'employant avec tous leurs  
moyens, à ramasser les corps des saints martyrs, furent pris  
par commission du Iuge Fabian, lequel le fit tenter par menaces  
& belles promesses l'espace de dix iours, & voyant qu'il n'auoit  
rien, les fit tourmenter par trois diuerses fois, & puis jeter  
en la mer. A Duraz en Macedoine les saints martyrs Pelagius,  
Lucian, Pompee, Hefchie, Papie, Saturnin & Germain  
Italiens de nation, s'estans retirés durant la persecution de  
Traian, & voyant saint Asie Euesque pendu en Croix pour  
la confession de la sainte Foy, se declarerent estre Chrestiens, furent  
pris sur le chap & plongés en la mer. En Alexandrie se fait  
la feste de saint Pantene homme Apostolique, doué de toute  
force de sauoir & doctrine, & si grand zelateur de l'honneur de  
Dieu, & de salut des ames, qu'il s'en alla aux derniers & plus  
esloignés quartiers d'Orient, pour y prescher le saint Euangile,  
puis fut requis par les ambassadeurs des Indes de se transporter*

*en leur pais, ce qu'il fit avec autorité de Demetrie Euesque  
d'Alexandrie: & puis reuenant en ladite ville, mourut en paix  
du temps de l'Empereur Antonin, surnommé Caracalla. A  
7. Bresse deceda S. Apollone Euesque & Confesseur. En Saxe S. Le-  
1112. t. Vvilleboud premier Euesque de Brene, lequel travaillant avec  
S. Boniface, pour semer l'Euangile en ces quartiers-là, conuerit  
plusieurs pais à la Foy. En Auvergne S. Ilde Euesque de Cler-  
mont. En Auvergne S. Hedde Euesque des Saxons, qui demen-  
rent vers l'Occident. En la mesme Isle trespassa sainte Edur-  
ge vierge fille d'un Roy d'Angleterre.*

LA VIE DE SAINT PROCOPE  
Martyr.

**L**Empereur Diocletian après auoir  
seulement puny la desobeyssance de  
la ville d'Alexandrie, s'en alla en  
Antioche, où il fit de cruels Edicts  
contre les Chrestiens, en faueur de ses faux  
Dieux, qu'il appelloit les conseruateurs & propa-  
gateurs de son Empire, desirant (s'il eust peu)  
abolir la Religion Chrestienne. Pendant qu'il  
s'occupoit en ceste impieté, vne grande Dame,  
nommée Theodosie, du sang des Senateurs,  
qui auoit esté mariée avec vn Gentilhomme  
Chrestien, lequel estoit decédé, se presenta à  
l'Empereur avec vn sien fils nommé Neanias,  
qui estoit vn ieune homme, adroit, robuste, &  
de bonne grace, & le supplia d'employer son  
enfant en quelque bonne charge, pour laquelle  
elle luy offrit vne grosse somme d'argent.  
L'Empereur receut volontiers ses deniers, &  
sçachant la qualité de Theodosie & de son fils,  
lesquels estoient fort grands idolatres, il fit Nea-  
nias gouuerneur d'Alexandrie, avec commandement  
de ne laisser aucun Chrestien en vie, &  
luy laissa pour cét effer vne forte garnison. Nea-  
nias sortit d'antioche avec ses lettres & proui-  
sions pour aller en son Gouvernement. Estant  
vn iour en chemin il fut surpris d'un tremble-  
ment de terre espouuentable, avec des tonnerres  
& esclairs, ceux qui l'accompagnoient s'en-  
fuyrent à demy morts de peur, & tomberent par  
terre. Neanias seul fortifié de la vertu Celeste  
s'arresta, & entendit vne voix esclatante qui luy  
dit, Neanias, où, & contre qui vas tu ainsi es-  
chauffé? Il respondit quil alloit par le commandement  
de l'Empereur, mettre à sac tous les Chrestiens,  
& leur fausse Religion. Vne autre  
voix luy repliqua, Et toy, ô Neanias, tu viens  
donc aussi contre moy? Le saint luy demanda,  
Qui estes vous? alors il apperceut vne Croix,  
beaucoup plus claire que le crystal, de laquelle  
fortit vne voix qui dit, Je suis Iesus crucifié, le  
Fils de Dieu. Neanias, quoy que bien estonné,  
ne laissa pas de repliquer, Comment est-il possible,  
Seigneur, que vous soyez le Fils de Dieu ayant  
esté crucifié & fait mourir avec tant de douleurs  
& d'opprobres? il respondit, Je suis mort par ma  
volonté, & ay pris sur moy les peines que les hommes  
doiuent souffrir pour leurs pechez, & les ay deli-  
urez en mourant, de la mort eternelle. Ceste  
vision disparut, & Neanias en demeura

8. fort consolé, & tellement embrasé de l'amour  
 IVIL- de la sainte Croix, qu'il entra incontinent dans  
 LET. la ville de Syropolie, où il fit venir secrettement  
 le plus excellent Orfevre nommé Marc, auquel  
 il donna charge de luy faire vne Croix d'or, sans  
 que personne en sceust rien: l'Orfevre y travail-  
 la de nuit en cachette des autres, & lors qu'il  
 l'eut acheuée il y parut trois mages avec des  
 lettres Hebraïques qui signifioient ce que c'e-  
 stoit. Il y auoit escrit au haut de la Croix, Ema-  
 nuel, & es deux bras, Michel & Gabriel. L'Or-  
 fevre fut bien esbahy, & vouloit effacer ce qu'il  
 auoit trouué qui ne venoit pas de luy, mais sa  
 main s'engourdit & appesantit si fort qu'il ne  
 peut remuer le bras. Neanias trouua au retour  
 sa Croix acheuée, avec les lettres que l'Orfe-  
 vre luy dit n'estre pas de sa main: ains s'y estre  
 trouuées miraculeusement, il le paya à son mot  
 & s'en alla bien content avec sa Croix: nostre  
 Seigneur desirant de l'encourager, & confirmer  
 dauantage en sa Foy, luy offrit incontinent vne  
 guerre contre les Agariens, qui rauissoient les  
 filles du peuple subiet à l'Empire Romain, & les  
 espousoient par force: il se mit en campagne  
 contr'eux, disant en soy-mesme, Je verray bien  
 maintenant si celuy qui m'apparut au chemin  
 est le vray Dieu. Ruminant ceste pensée il ouyt  
 vne voix qui luy dit, assure toy, Neanias, ie suis  
 ton Seigneur & ton Dieu, qui ne bougeray d'a-  
 uoir toy. Encouragé de ceste voix, il se rua fu-  
 ricusement sur les ennemis, dont il en demeura  
 six mille sur la place, sans perdre vn seul homme  
 des siens.

Sa mere Theodosie ayant sceu la victoire que  
 il auoit gagnée sur les Agariens, vint au deuant  
 de luy pour le congratuler & conduire au Tem-  
 ple des Dieux, afin de leur rendre graces de la  
 faueur qu'ils luy auoient faicte: mais son fils qui  
 estoit desia illuminé de la clarté du Ciel, & es-  
 pris de l'amour du vray Dieu, reietta le conseil  
 de sa mere, & luy dit, qu'elle estoit bien abusée,  
 renuersant deuant elle toutes les Idoles d'or &  
 d'argent qu'il foula aux pieds, & les fit vendre,  
 & en distribua les deniers aux pauvres. Theo-  
 dosie conceut de cela vne telle rancune contre  
 son propre fils, qu'oubliant qu'elle estoit celle  
 qui l'auoit porté dans ses entrailles, & le nom de  
 mere qui l'auoit engendré & esleué, elle l'accu-  
 sa à l'Empereur Diocletian, lequel commanda  
 incontinent au President de la Palestine qui es-  
 toit Italien, homme cruel, appelé Iuste, de se  
 saisir de Neanias, pour luy faire recognoistre &  
 adorer les Dieux immortels, ou de le faire mou-  
 rir cruellement. Le President le fit venir à Ce-  
 sarée, où tout le peuple demandoit à hauts cris  
 qu'on leur deliurast Neanias pour le mettre en  
 pieces. Le President trouua le Saint inuincible,  
 & plus dur que l'acier & le diamant: il le  
 fit gehenner & torturer. de là il l'enuoya en pri-  
 son: Le glorieux Martyr estant dans vn cachot,  
 chargé de chaines & de fers, fut visité sur la mi-  
 nuit des Anges du Ciel, reuestus de lumieres,  
 lesquels esclairsans ce lieu puant & obscur, ap-  
 pellerent le Saint par son nom. Il leur deman-

da qu'ils estoient: ils respondirent que c'estoit  
 les Anges de Dieu qui le venoient visiter. Alors  
 dit le Martyr. Si vous estes les Anges de Iesus-  
 Christ fleschifiez le genouil, & faites le signe de la  
 Croix sur vostre front. Les Anges firent ce  
 que leur dit le Martyr: lors il demeura bien con-  
 fus, s'estimant indigne d'vne telle visite, & con-  
 solation de nostre Seigneur, puis leuant les yeux  
 au Ciel, il apperceut le Roy des Anges Iesus-  
 Christ entouré de lumiere qui le baptisoit avec  
 de l'eau, disant: Tu n'auras plus nom Neanias,  
 ains Procope, combat vaillamment, afin que  
 d'autres par toy & avec toy soient couronnez de  
 la gloire du martyr. Le Saint entendant ce-  
 la se prosterna par terre, & demanda pardon de  
 ses pechez à nostre Seigneur & la force d'endu-  
 rer plusieurs martyrs, se resignant en ses bené-  
 fites mains: à l'instant il se trouua guaruy de tou-  
 tes ses playes, & sortit de la prison avec vne  
 splendeur extraordinaire, de maniere qu'à son  
 simple aspect beaucoup de gens se conuertirent,  
 & recogneurent nostre Seigneur Iesus-Christ  
 pour vray Dieu. Le President demeura fort  
 troublé, & voulant attribuer à ses faux Dieux la  
 santé & le lustre du Martyr, il dict aux assistans  
 qu'ils loiaissent tous la clemence des Dieux im-  
 mortels qui auoient fait ceste rare faueur à Pro-  
 cope, alors le saint Martyr repliqua: Pourquoi  
 n'allons nous donc au Temple des Dieux pour  
 voir à qui ie dois ce bien fait: Alors le Pre-  
 sident commença à respirer & tresiaillir d'aise,  
 estimant que procope voulust veritablement ad-  
 dorer les Dieux, & abandonner son obstination  
 passée. Il le laissa aller tout seul (d'autant que le  
 Martyr le voulut ainsi) dans le temple où ils en-  
 ferma, & fit sa priere à Dieu, qu'il mist en pie-  
 ces toutes les Idoles des faux Dieux qui estoient  
 là. A l'instant elles tomberent toutes en poudre,  
 & les soldats qui estoient allez pour le garder se  
 conuertirent, desirans desia de respendre tout  
 leur sang pour Iesus-Christ. Le President en-  
 uoya deux Colonnels, Nicoftrat & Antioche,  
 avec vne troupe de soldats pour tailler en pi-  
 ces ceux qui s'estoient conuertis, mais approu-  
 chans du Martyr, esclairez de la lumiere celeste,  
 ils se jetterent tous à ses pieds, le suppliant qu'il  
 les fist Chrestiens. Luy bien ioyeux les mena la  
 nuit à Leonce Euesque de la ville, qui les bap-  
 tisa tous, & depuis ils moururent pour la Foy de  
 Iesus-Chr. le 21. de May, & vn homme Noble  
 & pieux nommé Eulalie recueillit leurs Reli-  
 ques, & les enterra noblement. procope de nou-  
 uau enchainé & enfermé dans vn cachot, où il  
 fut visité par douze Dames, qui luy confesserent  
 qu'elles estoient Chrestiennes, dont le Iuge per-  
 uers estant aduertuy, les fit prendre, & les trouua  
 constantes en l'amour & confession de Iesus-  
 Chr. les fit passer par diuers tourmens, & puis  
 mourir; la mere de procope Theodosie se trou-  
 ua presente aux tourmens & aux supplices de  
 ces saintes femmes, & voyant qu'elles estoient  
 fortes par dessus la fragilité de leur sexe, ne se  
 laissans vaincre, ny à la puanteur & auisité  
 de la prison, ny à l'ardeur des tourmens, ny aux

vaines promesses & persuasions du Iuge, Dieu luy fit comprendre que ce n'estoit pas vne chose humaine, ains la vertu du Ciel, & de la Religion Chrestienne, qui fortifioit ainsi la foiblesse feminine. Alors toute embrasée de l'amour de Iesus-Christ, elle s'escria publiquement qu'elle estoit Chrestienne, dont le President fut surpris, qu'il la fit battre & deschirer avec des ongles de fer, & puis tracher la teste. Il n'est pas croyable combien ce saint enfant fut ioyeux du martyre de sa sainte Mere: mais le President pour reprimer sa ioye, luy fit donner plusieurs coups en la face, avec des pommeaux de fer, & ouvrir son corps, le rayonnant avec des pointes d'acier, & l'accablant d'autres horribles tourmens.

Mais voyant que tout cela ne seruoit de rien, & que le S. Martyr resistoit d'un courage invincible: il en tomba malade de rage & de despit, & en punition de son peché perdit l'une & l'autre vie. Flauien succeda en la charge de President à Iuste, non moins fier & cruel que son predecesseur: Celuy-cy pensa par sa Rhetorique (car il presumoit d'estre bien eloquent) persuader le Saint d'obeyr à l'Empereur: mais voyant qu'il perdoit temps, transporté de furie, il commanda à son seruiteur Archilas de passer son espée au trauers du corps du Martyr: le Saint attendoit couragement le coup; mais Archilas voulant porter son estocade perdit les forces, & tomba sur son espée par terre. Flauien ne sachant plus que faire, renuoya Procope en prison, & à six iours de là il le fit fouetter avec des nerfs, brusler avec des pestes ardantes, & jeter du sel dans ses playes. Le saint Martyr enduroit tout cela constamment: alors le Iuge outré de douleur, commanda qu'on luy estendit la main droite sur vn autel des Dieux, & qu'on luy versast dessus des gouttes de lard flambé avec vn peu d'encens, afin que si la douleur du feu luy faisoit branler la main, l'on dist qu'il auoit sacrifié, & offert de l'encens aux Dieux; mais ayant demeuré long temps, en sorte que le feu luy conformoit peu à peu la main, sans qu'il la remuast: au contraire, il dit ce verset du Psalmiste: *Seigneur, Seigneur, vous m'avez tenu la main,* le remerciant de ceste faueur. Les combats de Procope ne finirent pas si tost: on le pendit par les bras, & on attachà à ses pieds de grosses pierres pour le demembrer: on le ietta dans vn four chaud, par la vertu du signe de la Croix qu'il fit, le feu ne luy toucha point, ains se lança sur les Ministres qui l'allumoient. En fin ce Iuge impie donna sentence de mort contre le Saint. Quand on fust prest d'executer la sentence, Procope se mit en oraison au lieu du supplice, priant nostre Seigneur à chaudes larmes pour le salut de tous les affligés, pour les veufues, orphelins, malades, prisonniers, & affligés; spécialement pour tous ceux qui se recommanderoient à luy apres la mort, & demandoient à Dieu quelque faueur par son intercession. Vne voix du Ciel l'asseurà que nostre Seigneur auoit exaucé son oraison: alors il tendit le col, & eut la teste tran-

chée le huitiesme de Iuillet, auquel iour tous les Martyrologes Latins, & le Menologe des Grecs parlent de luy, & celebrent son martyre. Metaphraste a escrit, ainsi qu'il est rapporté dans le 4. Tome de Surius, & au 2. Synode de Nice. On cite les actes de saint Procope, & on allegue vn exemple de la veneration des saintes Images. Eusebe en son Histoire liure 8. ch. 12. & Nicephore liure 9. chap. 15. & le Cardinal Baronius en ses Annotations font mention de luy.

*En l'Asie Mineure trespasserent S. Aquilas & Priscille sa femme, desquels S. Luc fait mention es Actes des Apostres. A Cesarée ville de Palestine, se faisoit iadis la feste de saint Procope martyr, lequel ayant esté durant la persecution de Dioclerian, mené de Scythopoli en ladite ville de Cesarée, & ayant commencé à respondre constamment, fut incontinent apres la premiere response, condamné par le Iuge Fabian, & eut la teste tranchée. Sur le port de Rome, durant la persecution d'Aurelian, furent massacrez cinquante soldats, qui auoient esté conuertis durant le martyre de sainte Bonese, & puis baptisez par le Pape Felix. A Constantinople endurerent le martyre plusieurs saints Religieux Abrahamites, qui auoient resisté à l'Empereur Theophile, & combatiu virilement pour l'honneur de nos saintes images. A Vintzbourg en Allemagne se fait la feste de S. Chilian Euesque, lequel ayant esté enuoyé en ces quartiers-là par Conon Pape pour y prescher l'Euangile, & ayant conuertit plusieurs personnes, fut massacré avec ses deux compagnons Coloman Prestre, & Iorman Diacre. A Treues trespassa saint Auspice Euesque & Confesseur. A Milan S. Ample Euesque & Confesseur.*

*A Rome pres du quartier qu'on nommoit la Gourte, qui coule tousiours, furent mis à mort saint Zenon, & autres dix mille deux cens & trois martyrs. Item à Rome les saints martyrs Dignissime, Gordian, & leurs compagnons, pour suuis par la fureur & barbarie des schismatiques, parce qu'ils suiuoient saint Symmaque Pape, par plusieurs approuués, furent massacrez avec plusieurs saintes Vierges consacrées à Dieu. A Grintine ville de l'Isle de Cantie, S. Cyrille Euesque ayant esté pris durant la persecution de Dece, sous le President Lucie, & ietté au feu, en sortit sain & sauue, le feu ayant seulement bruslé les cordes de lesquelles il auoit esté lié; Miracle qui estoit tellement le Iuge, qu'il luy donna liberré. Mais depuis pour auoir continuellement presché le saint Euangile, il fut repris par autorité du mesme Iuge, & decapité. A Thore ville sise sur le lac de Terin en Ombrie, decederent sainte Anacolie vierge, & S. Audax sous l'Empereur Dece. Sainte Anacolie ayant enduré vne infinité de tourmens, fut deliurée de la rage d'un serpent qu'on auoit lâché sur elle, quoy voyant ledit Audax, fut conuertit à la Foy, & puis comme elle se fut mise à prier Dieu les bras tendus, le bourreau luy passa l'espée à trauers le corps: par apres Audax ayant esté mis en prison, fut condamné d'auoir la teste tranchée. En Alexandrie se faisoit iadis la feste des saints Patermache, Croper, & Alexandre, qui furent massacrez du temps de Iulien l'Apostat. A Pampelone S. Briete Euesque ayant souffert plusieurs tourmens sous le Iuge Marcian, & conuertit plusieurs infidelles à la Foy, mourut Confesseur.*

LA VIE DES SEPT FRERES MARTYRS, enfans de sainte Felicité.

**D**V temps de l'Empereur Marc Aurelle, il y auoit à Rome vne sainte matrone, nommée Felicité, de grande maison, mais beaucoup plus illustre en pieté, laquelle auoit sept garçons tous Chrestiens, & nourris du lait de la foy Catholique, avec de saintes & bonnes meurs. Ceste